



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Epistolarvm Innocentii III. Romani Pontificis Libri Vndecim**

**Innozenz <III., Papst>**

**Parisiis, 1682**

Trecen. Episcopo.

**urn:nbn:de:hbz:466:1-20006**

ARCHIEPISCOPO  
& Archidiacono Senonen.

Epist. 190.  
Clericus, qui  
casu puerum  
occiderat, ab-  
solvitur.

**E**Xposuit nobis dilectus filius M. Presbyter de Stabulis, quod cum olim invitatus à quibusdam pueris, de manu unius eorum arcum receperit & sagittam, & eam dirigere voluerit in arborem quæ obstabat, manu errante sagitta eadem discurrens per aërem, puerum quendam valde distantem modicum vulneravit in capite, propter quod idem puer creditur postmodum expirasse. Quod cum idem Presbyter bonæ memoriæ G. prædecessori tuo, frater Archiepiscopo, sponte curasset humiliter confiteri, ipse pœnitentiam & contritionem ipsius attendens, super beneficio Ecclesiæ de Stabulis, quam in archidiaconatu tuo fili Archidiacone adeptus fuerat, misericorditer dispensavit, ut ipsum, quoad viveret, possideret; mandans eidem ut ad sedem apostolicam accederet, mandatis super officio apostolicis pariturus. Quia verò in hoc non ex voluntate, sicut asserit, sed casu deliquit, discretioni vestræ per apostolica scripta mandamus quatenus si verum est quod asserit, factam cum eo misericordiam attendentes, quod à dicto Archiepiscopo factum est ratum habentes & firmum, eum super beneficio prædicto propter hoc nullatenus molestetis, aut patiamini ab aliis molestari. Datum &c.

## TRECEN. EPISCOPO.

Epist. 191.  
Vt plura beneficia habentes,  
resignare cogantur, & quod  
Clericos suos,  
quando publica  
salus postulat,  
ad majores ordines suscipiendos  
compellere  
queat.

**I**Njuncti nobis officij ratione compellimur, & caritatis debito provocamur, fratribus & cœpiscopis nostris in suis justis petitionibus favorem apostolicum impertiri: ut qui specialiter in partem nostræ sollicitudinis sunt vocati, tanto commissum sibi officium liberius exequantur, quanto se & jura sua majori viderint sedis apostolicæ benignitate juvari. Eapropter, venerabilis in Christo frater, tuis justis precibus benigno concurrentes assensu, ad exemplar prædecessorum nostrorum felicis memoriæ Lucij & Clementis Romanorum Pontificum auctoritate tibi præsentium indulgemus ut Clericos tuæ diocesis, qui contra statuta Lateranen. Concilij prævæ cupiditatis ardore plures Ecclesiæ vel ecclesiastica beneficia detinere contendunt, cum de proventibus unius ipsi congruè valeant sustentari, ad canoni-

cum valeas reducere moderamen. Clericos verò Ecclesiæ tuæ, quos necessitas postulaverit ad sacros ordines promoveri, secundum privilegium M. prædecessori tuo & successoribus tuis à felicis record. Alexandro Papa prædecessore nostro indultum, liceat tibi, si idonei fuerint, nec de canonica poterint institutione repelli, ad eosdem ordines suscipiendos secundum canonum instituta compellere, vel si inobedientes fuerint, animadversionis ecclesiasticæ sententia cogere, nisi contra hoc alicui fuerit sedis apostolicæ auctoritate indultum ut ad suscipiendos ordines non cogatur. Et quia Trecen. Ecclesiæ tuæ provisioni commissa, tuo debet moderamine gubernari, nec ullus in messem tibi creditam falcem debet ausu temerario mittere, præsentium auctoritate statuimus ut nulli subditorum tuorum liceat, post appellationem ad te rationabiliter factam, parochianos tuos excommunicatione percellere, vel commissas tibi Ecclesias supponere interdicto. Quod si præsumptum fuerit, sententiam decernimus non tenere; & si non præcedente appellatione sententia talis ab aliquo subditorum tuorum fuerit irrationabiliter promulgata, sententiam talem valeas, prout justum fuerit, relaxare. Nullis literis institutioni canonicæ præjudicium facientibus à sede apostolica impetratis. Datum Romæ apud sanctum Petrum.

SENONEN. ARCHIEPISCOPO  
& Trecen. Episcopo.

**C**VM omnes unum corpus simus in Christo, singuli autem alter alterius membra, non debent majores minoribus aut seniores junioribus invidere, sed omnes qui in una Ecclesia uni Domino famulantur, pari gaudeant libertate, cum pondus & pondus, mensura & mensura, utrumque abominabile sit apud Deum, & evangelicus paterfamilias pari mercede primos vineæ suæ operarios remuneraverit & extremos. Verùm ad audientiam apostolatus nostri pervenit quod dilecti filij Trecen. Canonici, propriis inhiantes commodis, & aliorum profectibus invidentes, novum fecerunt in Trecen. Ecclesiæ constitutum, ut eis tam in præsentia sua quam absentia redditus suos ex integro percepturis, qui in eadem Ecclesia post illam institutionem fuerunt vel de cetero fue-

Epist. 192.  
Ne quid in proprium commodum & successorum detrimentum Canonici constituant.